

L'é pontà via i corsc de Antropolad

67 dozenc e studenc universitàres tol pèrt al secondo an de auta formazion de la Scola Ladina de Fascia



L'inaudazion del percors de auta formazion "Antropolad" l'an passà te Sorastanza de la Scola Ladina de Fascia.

Didatica - I é 67 i studenc che tacà ite anché, vender ai 5 de otober, l' secondo an de "Antropolad", l' percors de auta formazion endrezà da la Scola Ladina de Fascia. Se trata de n percors che é tacà ite te l'an de scola 2017/18, l' à regnèda per doi egn e l' é out ai dozenc en servije, i studenc universitàres e i operadores culturai del teritorie che pel aer na formazion più menuda ti ciampes de la linguistica, de la letradura e de la cultura ladina e amò apede ence te l' antropologia alpina.

Da egn la comunanza ladina de Fascia spetà la costituzion de n sistem permanent de "auta formazion" per ge permeter a chi che jà ensegna, ma ence ai studenc universitàres che sarà i dozenc del davegnir, de tor sù la competenzes linguistiches e culturèles che serf per ensegnèr te la Scola de Fascia, che cogn garantir n percacent e efizient ensegnament del lengaz ladin, te n chèder de educazion plurilingue e averta a l'Europa, col tor dant ence la cognoscenta de la carateristiches de la comunanza ladina sot l' profil storich-antropologich.

Antropolad fèsc pèrt del Pian anuèl de l'ativitàes de formazion de la Scola Ladina – à spiegà la Sorastanta Mirella Florian – per i doi egn de scola 2017/18 e 2018/19. La Convenzion é stata aproèda dal Consei de la Scola Ladina dò l'aproazion de la Provincia de Trent con D.P.G. nr 530 di 7 de oril del 2017 e de l'Università de Busan stata ai 21 de oril con la delibera nr 51.

La Convenzion l' é l' resultat del

lurier en sinergia anter la Scola Ladina de Fascia e la istituzions del teritorie desche l'Institut cultural ladin "majon di fascegn" e l' Comun general de Fascia, ensema a la Provincia de Trent e la universitàes de Trent e Busan, per svilupèr e renforzèr la competenzes profesionèles di dozenc travers l' strument de la formazion structurèla e permanenta.

I scric ite a Antropolad dèsc la misura de la valuta del projet: n numer sorafora la spetadives ajache al scomenz l'era stat fissà n numer mascim de 50 persones. I dozenc à dit de esser n muie contenc de aer tout pèrt al prum an de cors e che più n'outa i à podù durèr te la didatica chel che i aea emparà ai corsc.

La lezions vegn fates de vender domesdi da les 15 a les 19 e de sabeda da doman da les 9 a les 13.00. Chest an l' é pervedù chisc corsc: ai 5, 6 e 12 de otober, linguistica ladina con Paul Videsott (ai 12 de otober a la fin de la lezion del professor Videsott vegnarà prejentà la neva publicazion de Fabio Chiocchetti sui scritores ladins); ai 13, 19 e 20 de otober, letradura e analisa di tesé con Fabio Chiocchetti, la lezions é tel lengaz ladin; ai 9, 10 e 16 de november, mudamenc sozièi, mendranzes e identità con Ester Gallo, la lezions é tel lengaz talian; ai 17, 23 e 24 de november, etnografia e antropologia visuèla con Cesare Poppi; al 1, ai 2 e 8 de mèrz, lessicologia e toponomastica per ladin con Paul Videsott; ai 9, 15 e 16 de mèrz, didatica del ladin e glotodidatica con Ruth Videsott, la lezions é tel lengaz ladin.